

0 10 20 30 40 50 60 70 80 90 100 110 120 130 140 150 160

centimetres
1
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30
31

22.6513
15.77.446
52





Kodak Color Control Patches

雲閣志中

仙苑

白雲道不明

可謂無所



雲閒志中

仙梵

自吾道不明而釋老之教始行若藏奩藏奩徒於其教不
可謂無所得者揆之吾教不當書夷考方志往往不廢其人
故亦得以載焉

心鑑禪師

高僧傳藏奩姓朱氏蘇州華亭人也母方娠及誕嘗聞異
香未冠禮道曠禪師出家詣嵩嶽受具戒再詣五洩山入
靈默大師室參授道要唐大中十二年洛下脩長壽寺敕
奩居焉明年歸姑蘇再住明州棲心寺所在禪者雲集凡

入師室者疑難冰釋咸通七年示寂葬於天童山其徒以
行狀詣闕請謚賜號心鑑塔曰壽相

朱涇船子和尚

傳燈錄名德誠入藥山洪道禪師室大明宗旨與道吾雲
巖爲道契自離藥山小舟往來松江朱涇以輪釣度日人
號船子和尚時夾山善會禪師住京口鶴林寺道吾知其
所得尚淺令往參船子和尚會造朱涇見誠大契宗旨辭
行再四回顧誠喚會回立起撓曰汝將謂別有耶迺覆舟
而逝唐咸通十年僧藏暉即其覆舟處建寺焉

聰道人

靈鑑塔銘云姓仰氏名德聰初受具戒於梵天寺參請諸
方密契心印太平興國三年結廬於余山之東峯有二虎
大青小青爲侍有造之者見掛一書梁闡問之曰此佛經
也問嘗讀否曰如人看家書一遍旣知其義何再讀爲嘗
曰古人貴行吾何言哉其他問者皆默然不對天禧元年
七月趺坐而逝閱月容貌如生

王可交

續仙傳蘇州華亭人也以耕釣爲業居松江趙屯村一日
擢舟入江方擊楫高歌忽見彩舫漾於中流有道士七人
中有呼可交者頃之不覺舟近舫側有呼可交上舫者道

士皆視之一人曰好骨相合仙生凡賤閒已炎破矣一人於筵上令侍者傾酒飲之不出與二粟食之甘如飴命黃衣送上岸覓所乘舟不可得但覺風水林木之聲開眼峯巒重疊松柏參天乃在天台山瀑布寺前僧迎問之曰今早離家蓋三月三日僧言九月九日已半年餘矣僧設食可交厭聞食氣自後絕穀挈妻子住四明山不復出今人時有見之者

寺觀

浙右喜奉佛而華亭爲甚一邑之間爲佛祠凡四十六緇徒又能張大其事亦可謂盛矣故迹其創造歲月而次第之道

宮一附見焉

靜安寺

在滬瀆按寺記吳大帝赤烏中建號滬瀆重聖祖諱寺佛

法入中國雖始於漢而吳地未有寺也赤烏十年康僧會

入境孫仲謀始爲立寺建鄴曰建初建初者言江東初有

佛法也豈滬瀆寺相繼創建耶景筠石幢記中閒號永泰

禪院本朝祥符元年改今額釋迦方志云晉建興元年有

二石像浮於吳松江口吳人朱膺等迎至滬瀆重聖祖諱

寺像背題曰維衛曰迦葉松陵集建興八年漁者於滬瀆

沙汭獲石鉢以爲白類葦而用之佛像見於外漁者異之

乃以供二聖今佛與鉢皆在平江開元寺有毗盧遮那佛
吳越王瑜迦道場中像佛五臟皆書錢氏妃嬪名氏有陳
朝檜皮日休陸龜蒙有重犯聖祖諱寺雙檜詩

普照寺

在縣西二百八十步唐乾元中建初名大明寺大中祥符
元年改今額寺有陸將軍祠世傳地本陸氏園亭因以祠
焉世傳固未可信而嘉禾詩文乃謂陸機捨宅爲寺亦妄
矣機死於晉太安二年而寺建於唐乾元中豈得爲機捨
宅乎或恐其後子孫按晉史世說敘錄機之子蔚夏同父
遇害於洛中雲之後亡又機故宅在華亭谷東崑山下非

今邑中也寺有北方天王祠吳越王加封護國石刻存焉
沈存中筆談載雷震天王寺屋柱倒書曰高洞楊雅一十
六人火令章凡十一字內令章兩字特奇勁似唐人書體
今石刻尚存即此寺天王堂也寺之東北隅有善住教院
傳賢首宗

圓智寺

在干山舊名禪居按宗毅寺記唐大中十三年建之於邑
西南二里晉天福中水壞寺基始遷於干山太平興國中
都水使錢綽始建造堂宇有僧熹蟾入天台韶國師室來
住此寺人多歸之精舍始全備朝廷賜蟾師號曰崇惠明

教治平中賜今額

寶雲寺

初名法雲寺在顧亭林市西北隅大中十三年建晉天福五年湖水壞寺基始遷寺南高基即陳顧黃門故宅寺有顧黃門祠有沈瑛及靈鑑寺記伽藍神記治平中賜今額

普門院

在盤龍去縣五十里唐大中十二年吳人陸素建本名觀音院祥符元年賜今額寺有石天王舊傳因大水漂至今多禱之

寶相寺

在縣西南三百步本清禪尼寺唐乾符元年造大中祥符元年賜今額

方廣寺

在柘林去縣八十里唐咸通六年造按寺記蔡侍郎功德院建隆中賜額延壽院治平元年改今額寺有蔡侍郎祠

詳見祠廟門

蔡氏墳塋在寺之左右石幢猶蔡氏故物

法忍院

在朱涇去縣三十六里即船子覆舟處所唐咸通十年建本名建興院治平元年賜名法忍寺有船子和尚夾山會禪師遺像至今祠焉

超果寺

在縣西三里本名長壽寺唐咸通十五年心鏡禪師造按唐會要洛陽伽藍記武后以齒髮既老造長壽寺於東京改元長壽又高僧傳載心鏡禪師藏奘蘇州華亭人會昌廢寺大中復脩洛下長壽寺救奘居焉奘後嘗歸鄉造寺豈此復名長壽寺乎盧仝集訪曦上人詩有三入寺曦未來及含曦答詩長壽寺石壁盧公一首詩之語玉川先生居洛城裏則長壽寺固其常遊也今乃以盧詩爲在華亭則妄矣治平元年改今額有觀音大士像寺有石刻云本錢武肅王宮中所祈禱者太平興國中錢氏歸國僧慶依

得之未知所適一夕夢白衣人告曰吾與若偕之雲閒既寤乘舟而來將至縣西大士舒祥光下貫超果遂迎以祠焉至今雨暘皆禱之寺有天台教院按芝園集雲閒超果十方學校香嚴湛創建有陳舜俞爲之記

福善院

福善院在趙屯梁

仁宗

明六年僧智道立精舍晉天福

二年賜名尊勝院大中祥符元年改賜今額

明行院

在南橋晉天福五年里人蔣漢瑛造請於錢忠懿王始名安和院至太平興國八年改賜今額

院記

華亭圖謀載春秋時夫差三女子墓田曰三女岡聲詩則播諸唐令尹詢并荆公王介甫都官梅聖俞邇岡之刹曰安和晉天福五年蔣漢瑛環堵中芬陀利花擢於陸聚族而謀曰是八吉祥六殊勝處盍施諸釋梵家遂基此刹植榦於是者曰本立病潮齧岸址白漢瑛議徙於此改曰明行用淮海王錢中令歸朝所請之額堂宇樓殿金碧煥粲雲棲駕瓴月行璇題具如經說凡所當有罔不具藏乘二千餘卷棗柏大士華嚴合論在焉鐘梵壓萬籟爲一方宅心純想之地遷善遠罪者咸知鄉方一燈長明四檀委輸規矩準繩有條而不紊

五季方中水立晝昏真人應期民登衽席聖聖授受幾三百年未聞識載固自若也云胡惠日求紀述爲日曰故國喬木其大蔽雨其高垂雲可無封植日冀懋長風雷之鼓盪雨露之膏沐而至此也一刹百堵容數千指功倍封植惠戒剪伐人天之所瞻龍象之所懷不啻故國喬木罔知剝業之難難則將怠乃訓盍講明以詔後世不亦可乎因其說系之以辭辭曰

五季中民屯澶沸如糜號無天中令君吳越錢奮一旅圖萬全玉節勁金城堅王海國遮中原振義聲開福田空寂崇經象傳幢刹建泉貨捐爲帡幪持危顛誓子孫銘肺肝摛錦繡

包山川歸有德同永年帶如河厲如山與竺乾無黨偏
勅差臨安府淨慈光孝禪寺住持北礪居簡記

結界記

余作三女岡明行院記於嘉熙初元越二年結大界相成薦
請紀其事其說曰天可陟吾疆不可入地可陷吾疆不可犯
不吉祥及諸惡律儀自退舍於廣莫之野而無何有之鄉且
夫天地之大八荒之廣從而無際衡而無朕雖吾廬千柱萬
礎磅礴川谷包絡平野眇而眇之一餌耳吾身小天地淵乎
方寸者心也至微也至幽也出入無時莫知其鄉三灾彌淪
心爲本根不鉏其根滋蔓罔旣乃於是中自燔自溺然則界

相在此而不在彼曩記錢唐大雄院創建之顛末嘗究其說
矣今此舉行墜緒補有寺以來闕典故申言之且嘉其事法
精至而秉法攝僧攝衣攝食唱相羯磨與波羅提木人絲毫
不忒皆寺之傳教比丘惠日講明而奏厥功乃策其勲而系
之以辭辭曰

善乎明行大界相之結也彌滿清淨於其內他莫我干也噫
結固易與爾守難乎哉傳曰重門擊柝以待暴客備禦侮也
匪擊柝戒嚴於其外則猾闖狡鬪強侵暴陵重門果何恃辟
夫倚界相之固不希勝進槃樂怠傲習燕安之鳩自以爲安
室利處忘自永多福則非吾所敢知

白蓮花詩

僧惠日

神物何由測芬陀陸地興素芳呈玉雪梵刹肇丘陵換額從
偏霸懸碑自老僧慇懃勸來者期使續千燈

同前

趙崇森

舊址來從晉中更幾廢興一蓮開陸地三女臥岡陵題咏誇
先輩流傳得主僧林深鐘梵寂長夜一明燈

同前

高子鳳

地產枝蓮異蓮宮自此興殊祥天不靳奇豔雪堪陵魄化疑
吳女碑傳有蜀僧何當尋勝槩吟斷佛前燈

同前

惠日

白羽芬葩陸地蓮可曾搖曳水中天肯於素豔分新潔不與
紅酣閒碧鮮玉井無因期摘實金園有兆必開先應知瑞與
優曇並一朵騰芳萬古傳

同前

僧善月

天開地闢詎云賒異草靈苗特一家不有岡頭三女粲爭敷
處子六郎花英雄有種凜生氣白玉微根不受瑕他時若補
芬陀傳端與優曇定等差

同前

僧居簡

三女岡邊寺樓臺競鬱峨近郊閒梵放陸地出芬陀天福雖
營刹中原尚枕戈烟塵絕淮海熨帖看鯨波

七寶院

在縣東北七十五里元係福壽院大中祥符元年賜今額寺有五代時檜今已合抱

布金寺

在大盈唐大和二年建本法雲禪院治平元年易今額紹興閒復為禪院寺有陳舜俞經藏記

明心院

在北橋去縣三十五里按錢武肅王立寺記都水使者錢綽造武肅王以誦華嚴經僧居之因以為華嚴院治平二年賜今額

興聖院

在縣東南二百步按孤山閒居集載興聖院結界序漢乾祐二年邑人張犯壽皇舊名之子仁捨宅為寺本名興國長壽祥符中改覺犯聖祖諱院後改今額寺有嘉祐中賜藏經

海惠院

在白牛市建隆初里人姚廷睿以宅為寺初名興國福壽院治平元年改今額姚即為伽藍神

空相寺

在龍華張仁泰請於錢忠懿王始建舊號龍華寺治平元年改今額西北隅有白蓮教院

證覺教院

在縣西南百五十步太平興國二年立本無礙浴院大中祥符元年賜今額

普照教院

本余山東庵治平二年賜額寺本聰道人所居因以爲寺有聰道人塔在山頂寺有上方日月軒衆山環列其前蓋絕境也

宣妙院

本余山西庵治平二年賜額寺有上方

惠日院

本余山中庵治平二年賜額

慈雲昭慶禪院

本余山之靈峯庵有馬嶠禪師塔其銘曰禪師傳雲門正派大闡法席建立精舍復古寺額寺有金沙地芥子庵

隆平寺

在青龍鎮市元名國清院寺有米元章所書經藏記

隆福寺

在青龍鎮元報德寺唐長慶元年造

勝果寺

在青龍鎮寺有沈光碑紹聖中呂益柔撰妙悟大師希最

塔銘云最學天台教緇林號曰義虎後居勝果寺僧房有鬼物爲祟最爲講說於空中得朱書數十字自稱漢朝烈士沈光大略悔過謝罪之語事頗近怪故不詳載

普寧慧日院

在孔宅寺有宣聖祠元豐閒賜額

太平興國禪院

在胥浦南去縣四十五里紹興二年請省額

寶勝禪院

在縣東四里紹興六年請省額

演教禪院

在縣南二里紹興二十六年請勅額崇寧中有僧普願爲施水庵鑿地得住世羅漢像十六軀人異之因立寺焉
慈濟院

在海中金山絕頂元豐閒釋惠安造紹興元年請額

普光王寺

在薛澱湖中山頂建炎元年請額

延恩報德院

在縣西五里紹興二十四年請額

淨居禪院

在縣東北三百步紹興五年請額

觀音慈報禪院

在縣東北八十里崇寧二年請省額淳熙五年參政錢公良臣請賜功德院也

永定禪院

在周浦村淳熙十四年請額

保安院

在泲西五十里乾道七年請額

廣化漏澤院

在縣西南二里一百步紹興三年請額

寶藏護國禪院

在縣西南二里一百步紹興三年請額

在縣西南五十四里紹興四年請額

興塔院

在縣西南五十四里紹興四年請額

崇福院

在縣東南五十四里紹興四年請額

白蓮寺

在縣西五十四里紹興二十六年請額

大聖院

在縣東五十四里隆興二年請額

報恩院

在縣西四十里乾道二年請額

寧國寺

在縣東北四十五里乾道二年請額

延慶教院

在縣東南三百步乾道六年請額

集福保國水陸禪院

在白牛市之東淳熙九年請額

仙鶴觀

在縣南二百步紹興三十一年復建

祠廟

古者祀有常典凡山川林谷丘陵能出雲爲風雨與夫施法於民以死勤事以勞定國禦大災捍大患者皆得以祀之邑之廟祀不一其尤昭著者國之功臣邑之先哲或死於民社之寄與夫山川林谷丘陵之能出雲爲風雨者亦當矣惜乎歷歲浸久名號弗正稽之傳記不足詢之耆老無證姑以所聞著於篇以俟來者

東嶽別廟

在縣西二里

靈濟昭烈王別廟

在縣西三里神姓張氏其英槩靈迹載桐川神祠蓋自漢

以來江浙多祠之縣之別廟始於淳熙八年

城隍廟

舊在縣西政和四年遷於縣東南七十步唐李陽冰曰城隍神祀典雖無吳越中多祠之今州縣城隍相傳祀紀信云

金山忠烈昭應廟

在海中金山去縣九十里別廟在縣東南八十步廟有吳越王鏐祭獻文云以報冠軍之陰德吳越備史云大將軍霍光自漢室既衰舊廟亦毀一日吳主皓染疾甚忽於宮庭附黃門小

犯英宗嫌名

晉曰國主封界華亭谷極東南有金

山鹹塘風激重潮海水爲害非人力所能防金山北古之海鹽縣一旦陷沒爲湖無大神力護也臣漢之功臣霍光也臣部黨有力可立廟於鹹塘臣當統部屬以鎮之遂立廟歲以祀之宣和二年賜顯忠廟五年封忠烈公建炎三年辛道宗領舟師由海道護行在所奏加封忠烈順濟且賜緡錢以新廟貌四年加封昭應按霍去病爲冠軍將軍而霍子孟爲大將軍今備史以爲霍光或者吳越祭文不考也嘉禾志有冠軍神廟又有金山廟皆云忠烈昭應則以一廟爲二矣

廣衛將軍祠

在普照寺寺有石刻載吳越王祭獻文云晉賢陸機之祖
按吳志機之祖遜初拜撫邊將軍又拜鎮西將軍又拜上
大將軍吳因漢制雖有雜號將軍而考之遜傳未嘗有廣
衛之號若機高祖紆守城門校尉曾祖駿九江都尉亦未
嘗位至將軍

陸司空廟

在縣南三里祥符圖經云陸四公未詳所出今俗傳陸機
廟按晉史機未嘗爲司空爲司空者機之從兄弟玩也又
原化記云蘇州華亭縣有陸四官廟元和初有鹽船泊於
廟前守船者夜於廟中獲光明珠則又以爲陸四官矣

築耶將軍祠

在沙岡有築耶城遺址尚存晉左將軍袁崧築也有築耶
將軍祠世傳祀袁崧云按晉隆安四年崧以吳國內史築
滬瀆壘以備孫恩明年恩陷滬瀆崧死境內祠之宜也築
耶之義未詳

顧侍郎祠

在亭林法雲寺有感夢伽藍神記開運元年仲春十有一
日寺成僧道中智暉夢二青衣來云陳朝侍郎至也後忽
見一人紫衣金魚儀容清秀曰此地吾之故宅荒已久矣
師今於上造佛立寺請立吾形像吾當護此寺也可尋舊

寺基水際古碑爲據明日二人各言其所夢不異就求之果得古斷碑文字破滅云寺南高基顧野王曾於此脩輿地志二僧於寺東偏建屋立像至今祠焉

通濟龍王祠

在滬瀆故老相傳自錢氏有國已廟食茲土本朝景祐五年太史葉清臣爲本路漕因浚盤龍滙禱於故廟神應如響於是復新祠貌有葉太史祭文刻石於廟中

蔡侍郎廟

在縣南白砂鄉八十里舊經云未詳據通幽記貞元五年在嘉興監徐浦下場糶鹽官場界今諸場亦有蔡廟場未

詳何神柘林方廣寺有蔡侍郎祠按寺記云自古相傳蔡侍郎捨宅爲寺竟無稽考惟石幢題云唐咸通六年蔡贊造去父母塋九十步去壽塋十六步三代皆當世文儒按犯仁宗嫌名貞元則德宗朝也咸通則宣宗朝也犯仁宗嫌名貞元中已有蔡侍郎祠矣雖稗官小說未可盡信不應咸通中蔡始造壽塋也豈寺之所祠與蔡廟場所祠各不同乎

姚將軍祠

在縣西一十五步初祠於證覺院政和四年始遷於此未詳何神

福順延德大王祠

在都酒務西未詳何神廟有楊景範造廟石刻云熙寧甲寅到官夢遊福順廟見執簿者辭顏求予治之未幾以漕命遷酒稅於王故宮之基乃用卜宅於茲土豈神之靈有以先授我耶

三姑祠

在柘湖之側吳地志秦時有女子入湖爲神即此祠也柘湖今湮塞爲蘆葦之場神亦弗祠今澱山湖中普光王寺亦有三姑祠靈甚湖旁三數十里田者與往來之舟皆禱焉故老相傳秦時人姓邢氏女兄弟三人云即柘湖所祠也

崑山

輿地方志推表山川蓋祖禹貢周職方之遺意也水多於山右淞皆爾而崇岡峻嶺華亭又無焉特其映帶湖海或得名自昔者不可遺軼今敘而目之

崑山在縣西北二十三里高一百五十丈周回八里陸機贈從兄士光車騎詩云髣髴谷水陽婉孌崑山陰注引陸道瞻吳地記曰海鹽縣東北二百里有崑山陸氏父祖葬焉輿地廣記云崑山陸氏之先葬此後機雲兄弟有辭學時人以玉出崑岡因名之按征北將軍陸禕墓今在山顛機山在縣西北三十里因陸機得名山下有村曰平原亦因

陸平原名之平原內史即機也干山圓智寺記云所謂機山者往往排巒列嶺槩爲陸氏之家山總而名焉

橫雲山在縣西北二十三里高七十丈周回五里本名橫山唐天寶六年易今名與機山相望僅五里許或云因陸雲名之有白龍洞在山頂之西南隅其深不可計山下有祭龍壇

澱山在縣北六十里在薛澱湖中周回三百五十步高三十丈山形四出如鼇上建浮圖下有龍洞屹立湖中亦落星浮玉之類傍有小山初年僅兩席許久之浸長寺僧築亭其上榜曰明極

金山在縣東南九十里周回十里高十七丈吳地記云有平坡可容二十人坐山北有寒穴其泉香甜

余山在縣西北二十四里高八十丈周回十八里舊傳有姓余者居此因名焉按姓苑余姓出南昌

干山在縣西北二十九里高七十丈周回五里舊圖經云昔有干氏居此圓智寺記云茲山後皆干氏所有故以爲名薛山在縣西北二十四里高九十丈周回七里吳地記云薛約道居此因以爲名

城山在縣北二十里高八十丈周回五里舊經云山狀周環如城因此爲名

細林山在縣西北十八里高五十丈周回七里本名神山唐天寶六年易今名

土山在縣西北二十五里高二十丈周回一里九十步

秦山在縣南六十里高二十八丈周回一里九十步

達岸山在縣東南百六十里海水中周回八里高二十五丈

竹嶼山在縣東南百八十里海水中周回六里高五十丈

許山在縣東南二百五十里海水中周回五里高五十丈

斡山在縣北三十里周回三里高五十丈

遮山在縣東南七十里周回二里高五十丈

浮山在縣東南一百里海水中周回一里一百步高十丈

蘇山在縣東南一百六十里海水中周回一百五十步高二

十丈

巖山在縣西北二十七里周回四里二十二步高四十丈

鳳皇山在縣西北十八里

陸寶山在縣西北二十五里亦本陸氏家山

水

華亭號爲澤國其東南則巨浸其西則長泖其北則松江縈繞二百餘里其浦澍則顧會盤龍崧塘大盈趙屯五者爲大昔桑欽酈道元生長西北故水經敘西北加詳而東南踈略識者思欲補欽之遺矣況一邑之水其能盡言之耶今考五

浦之源委而種別之其他陂塘河渠有可書者列次之焉
三泖

按廣韻泖水名華亭水也陸龜蒙詩云三泖涼波魚蕩動
注曰吾遠祖士衡對晉武帝三泖冬溫夏涼蓋謂此也祥
符圖經谷泖縣西三十五里周回一頃三十九畝半古泖
縣西四十里周回四頃三十九畝今泖西北抵山涇南自
泖橋出東南至廣陳又東至當湖又東至瀚海塘而止朱
伯原續吳郡圖經曰泖在華亭境泖有上中下之名泖之
狹者猶且八十丈又按海鹽之蘆瀝浦海鹽即武原也行
二百餘里南至於浙江疑此即谷水故道水經以爲入海

而此浦入江蓋支派之異也今俗傳近山涇爲下泖近泖
橋爲上泖或者其與陸士衡朱伯原之言合按縣圖又以
近山涇泖益園曰團泖近泖橋泖益園曰大泖自泖而上
縈繞百餘里曰長泖此三泖之異也或以須顧泖謝家泖
爲三泖此二者在縣之東南一陂澤爾與古所謂三泖者
相望五七十里殊不知泖自有上中下之名也

谷水

陸士衡詩髣髴谷水陽婉孌崑山陰陸道瞻吳地記云海
鹽縣東北二百里有長谷昔陸遜陸凱居此谷水東二里
有崑山父祖葬焉水北曰陽山北曰陰則此水在崑山之

北也寰宇記谷名華亭谷水下通松江祥符圖經華亭谷水東有崑山元和郡國圖志在縣西三十五里朱伯原續吳郡圖經本之酈善長云松江東南行七十里入小湖自湖東南出謂之谷水南接三泖陸士衡詩所云即此水也或曰縣之西湖即谷水也湖東灘磧即唳鶴灘也鶴飲此水其聲則清按圖經縣之西湖即瑁湖也如陸士衡詩吳地記寰宇記朱伯原續圖經言谷水如此而世傳如彼何也獨祥符圖經曰谷水在縣南長百五十步世之所傳其出於此乎

松江

松江在縣之北境七十里其源始於太湖口而東注於海書曰三江既入震澤底定韋昭以爲三江者松江浙江浦陽江也今浙江浦陽江與震澤不相入韋說非也續吳郡圖經據酈善長云松江自湖東北逕七十里江水分流謂之三江口吳越春秋云范蠡去越乘舟出三江之口入五湖之中謂此也庾仲初揚都賦注云太湖東注爲松江下七十里有水口分流東北入海爲婁江東南入海爲東江與松江而三今松江自吳江縣過甫里逕華亭入青龍鎮自湖至海凡二百六十里若夫有新江舊江之別者嘉祐閒吳中水災時李兵部復圭爲轉運使韓殿省正彥宰崑

山開松江之白鶴匯如盤龍之法其後崇寧中漕使邾亶又浚治之遂爲民利嘗詢之父老所以然者松江東注委蛇曲折自白鶴匯極於盤龍浦環曲而爲匯不知其幾水行迂滯不能逕達於海今所開松江自白鶴匯之北直瀉震澤之水東注於海略無迂滯處是以吳中得免水患

滬瀆江

在縣東北吳郡記松江東瀉海曰滬海亦謂之滬瀆廣韻滬水名也白虎通發源而注海曰瀆陸魯望漁具詩序列竹於海滬曰滬吳之滬瀆是也皮日休吳中苦雨詩全吳臨巨溟百里到滬瀆海物競駢羅水怪爭滲漉即此是也

江側有滬瀆壘蓋虞潭表崧防海之處兩旁有東西蘆浦瀉於瀆江舊圖滬瀆江口在縣東北一百十里

顧會浦

按慶歷開顧會浦記直縣西北走七十里趨青龍鎮浦曰顧會南通漕渠北達松江今日通波塘浦自斡山之陽地形中阜松江潮至半道輒回斡山之旁沙塗壅積故自慶歷辛巳紹興乙丑乾道乙酉一再開通未幾輒淤滯紹興乙丑因浚塘又於縣之北門築兩挾堤依舊基爲閘以時啓閉復於浦之東闢治行道石梁四十六以通東鄉之停浸

盤龍浦

自縣東北達於舊江以其委蛇曲折如龍之盤得名祥符圖經縣東北四十五里續吳郡圖經有盤龍滙者介於華亭崑山之閒步其徑纔十許里而洄穴迂緩逾四十里江流爲之阻遏盛夏大雨則泛濫淪稼穡壞屋廬殆無寧歲自乾興以來屢經疏決未得其要范文正公守平江嘗經度之未遑興作寶元元年太史葉清臣按漕本路遂建議醜爲新渠道直流速其患遂弭

崧子浦

按舊圖崧子浦在縣東北五十里又崧子塘在縣北十五

里分而爲二者蓋北十五里崧子浦之口東北五十里者下注於舊江口也慶歷開顧會浦記以爲嵩塘蓋此浦與顧會浦同流而異派皆瀉水於松江

大盈浦

在縣西北七十里南接澱山湖北自白鶴滙以達於松江浦闊三十餘丈慶歷開顧會浦記論華亭浦敘五而大盈居其一王介甫詩徒嗟大盈北浩浩無春秋即此浦也

趙屯浦

在縣西八十里南接澱山湖北達於松江浦闊五十餘丈即王可交遇仙處

內勳浦在縣西八十里

直浦在縣西北七十五里

南澥浦在縣西北六十八里

梁紇浦在縣西北八十里

艾祁浦在縣東北六十五里

華潮浦在縣東北六十五里

郭巷浦在縣東北六十五里

小來浦在縣東北三十五里

新涇浦在縣東北八十里

上澳浦在縣東北八十里

西蘆浦在縣東北八十五里

大蘆浦在縣東北八十五里

上海浦在縣東北九十里

南蹌浦在縣東北一百里

右浦凡十四在縣之北境皆所以達上流之水以歸於松江也

薛澱湖

在縣西北七十二里有山居其中湖之西曰小湖南接三泖其東大盈浦其北趙屯浦蓋湖所以受三泖及西南諸港之水自二浦以瀉於松江也舊圖所不載止有小湖在

西北六十里周回三里吳郡圖經云西北有白蜺馬騰谷
瑋瑁四湖舊圖谷湖在縣西北五十三里馬騰西北六十
里白蜺西北七十里今白蜺湖在長洲界所謂馬騰谷瑋
瑁相去五十里閒澱湖周回幾二百里茫然一壑不知孰
爲馬騰湖孰爲谷湖也此湖古來鍾水之地近者如白蜺
湖皆成圍田湖之四旁亦有築堤爲田者歲有水潦則瀦
水者益狹矣

錡湖

在縣西北三十五里周回二十里一名洋湖舊經云湖有
陸錡宅因以爲名又縣東南六十里亦有洋湖徑十餘里

今皆爲蘆葦之場

鶯竇湖在縣東三十里周回五里

來蘇湖在縣南七十里周回十七里

唳鶴湖在縣南四十五里周回五十六里

永興湖在縣南四十里周回三里

右四湖載之祥符舊圖今未詳所在

沈涇塘

在縣西五里南接運河北接大盈浦蓋自樵李城下水流
東北則此塘所以瀉上流之水也往時歲旱浚之遇潮漲
則亦可以引松江之水以資灌溉

古浦塘

在縣西行二十七里以達於泖歲旱亦可引三泖之水以資灌溉

鹽鐵塘

在縣東南長三十里世傳吳越王於此運鹽鐵因以爲名

杜浦塘

在縣東八十里

下沙浦

在縣東九十里紹興乙丑通判曹泳開港浦凡十八處

須顧泖

在縣東南二十里

謝家泖

在縣東南二十里泖北有泖涇

白龍潭

在縣西北三里世傳有龍蟠伏於中歲旱常禱雨焉

沸井浜

在滬瀆東西有蘆浦中間一水相通有數尺許特深如井然水騰涌晝夜不息或云海眼也常有戲浴於中者二三尺以下其氣稍溫

堰閘

華亭東南並鉅海自柘湖墜塞置閘十八所以禦鹹潮往來
政和中提舉常平官興脩水利欲涸亭林湖爲田盡決隄堰
以泄湖水華亭地勢東南益高西北益卑大抵自三泖五浦
下注松江以入於海雖決去諸堰湖水不可泄鹹水竟入爲
害於是東南四鄉爲斥鹵之地民流徙他郡中閒州縣雖知
其害復故隄堰獨留新涇塘以通鹽運海潮朝夕衝突塘口
至闊三十餘丈鹹水延入蘇湖境上乾道七年八月右正言
許公克昌請於朝時太博邱公宥除秀州陞辭之日面奉至
尊壽皇聖訓亟來相視與令堵觀議以新涇塘潮勢湍急運
港距新涇二十里水勢稍緩不若移堰入運港爲便於是募

四縣夫經始於九月廿六日畢工於十二月廿七日堰成併
築堰外港十六所港之兩旁塘岸四十七里百八十五丈有
奇明年正月廿二日上遣監察御史蕭之敏相視又捐四鄉
民租九年以招復流民又明年正月遣中使宣諭守臣張元
成增築二月特置監堰官一員招土軍五十人置司顧亭林
巡邏以防鹽運私發諸堰今堰外隨潮沙漲牢不可壞三州
之田得免鹹潮浸灌之患此聖天子德惠而二三臣之力也
堰成無記恐將來無所稽考故迹其本始而詳著之焉
運港大堰闊三十丈深三丈六尺厚二十一丈九尺

護

今上嫌名

涇堰闊十五丈深三丈五尺

黃姑涇堰闊五丈深一丈五尺

張戀涇堰闊十二丈深三丈

老兒涇堰闊二丈深一丈

何家涇堰闊十一丈五尺深二丈

善涇堰闊九丈深一丈六尺

張涇堰闊三丈深一丈

徐家涇堰闊九丈深一丈八尺

邵家涇堰闊九丈深一丈八尺

新開涇堰闊九丈深一丈八尺

招賢涇堰闊十一丈深二丈八尺

管家涇堰闊三丈深一丈四尺

戚家涇堰闊六丈深二丈五尺

了义涇堰闊五丈深二丈五尺

吳塔涇堰闊十丈三尺深二丈六尺

蔣家涇堰闊七丈五尺深一丈六尺

竹岡堰在縣東六十里未詳所在

砂岡堰在縣南七十里未詳所在

鹹塘岸

運港東塘岸自運港堰至徐浦塘計二十四里一十七丈
西塘岸自運港堰至柘湖二十三里上闊六尺下闊一丈

五尺高六尺

舊瀚海塘

西南抵海鹽界東北抵松江長一百五十里

張涇閘

在縣東南四十八里隆興甲申八月本路漕臣姜誥奏請於張涇堰增庫爲高築月河置閘其上甃巨石兩址相距常有四尺深十有八板板尺有一寸以時啓閉故鹹潮無自而入月河之長三千三百五十有五尺廣常有六尺許克昌爲之記

冢墓

祥符圖經載諸陸潘濬笮融凡十二墓若濬與融旣非邑人不知何自而葬於此陸禕墓在崑山碑誌尚可考反不及之無乃未見征北墓碑耶然諸陸之墓自禕外訪其處所無復存者而融墓至今稱之事有幸不幸者可爲之歎息

陸康墓在縣西北二十里

陸遜墓在縣西北二十三里

陸抗墓在縣北二十二里

陸瑁墓在縣西北三十二里

陸凱墓在縣西北二十二里

陸宏墓在縣西北四十里

陸暕墓在縣西北四十四里

陸監墓在縣西北一十九里

陸景文墓在縣西北三十里

陸叡墓在縣西北十九里

已上詳見人物門

潘濬墓在縣西北二十里按吳志云濬字承明武陵漢壽人也弱冠從宋仲子受學爲郡功曹孫權殺關羽於荆上拜爲輔軍中郎將有功遷奮威將軍權即位封劉陽侯遷太常赤烏二年薨

笮融墓在縣東北四十里按吳志云融丹陽人初徐州牧陶

謙使督廣陵運漕曹公攻謙徐土蕭條融將男女一百口馬三十匹走廣陵今北亭鄉有笮墓涇涇旁有高壠世稱爲笮墓云

陸禕墓在縣西北二十七里崑山之絕頂舊有征北將軍陸禕墓碑今雖斷毀不全而龜趺尚存焉

知縣題名

自置縣以來唐之賢宰舊經所載止蘇籥一人稱其在縣簡惠蒞事公正國朝咸平以前令之姓氏無所稽考自咸平五年迄於建炎二年商餘慶至許知微凡五十有三人則姚舜明爲之記自紹興元年迄於淳熙元年呂應問至劉侯凡一

十有九人則劉侯爲之記自淳熙三年迄於紹熙四年趙汝
諲至楊潛凡七人則楊潛爲之記其閒流風善政爲民所稱
誦者蓋亦有焉

唐張聿琅琊人

包某延陵人德宗時

蘇籥

商慶餘咸平五年

劉唯一景德元年

孟虛舟大中祥符元年

李釋回大中祥符三年

董抗大中祥符五年

尚達大中祥符九年

蹇利涉天禧元年

張貽慶天禧二年

李衡乾興元年

張鑄天聖元年

王舉直天聖二年

田慶遠天聖三年

李宏天聖五年

向繹天聖七年

楊備天聖十年

唐詢明道二年

錢括景祐三年

丁詡寶元二年

錢貽範康定二年

謝景温慶歷四年

宋宜慶歷六年

章拱之皇祐元年

吳及皇祐四年

楊慥至和元年

胥元規嘉祐二年

聶儀仲嘉祐五年

表晉材嘉祐七年

胡定之治平二年

張若濟熙寧元年

上官汲熙寧四年

邵奇熙寧七年

盧乘元豐元年

雲中

中

周 袞 元豐四年

陶 鎔 元祐二年

章 景遇 元祐七年

俞 結 紹聖三年

孫 植 元符三年

楊子方 崇寧元年

楊光弼 大觀元年

章 懿文 大觀四年

黃昌衡 政和七年

鮑貽愿 宣和三年

陳 謚 元豐七年

劉 鵬 元祐五年

黃 佖 紹聖元年

賈 泰 元符元年

左 禹 建中靖國元年

章 玫 崇寧二年

徐思安 大觀三年

姚舜明 政和元年

胡 侃 宣和元年

陳 球 靖康元年

許知微 建炎二年

張公紱 紹興三年

林 衡 紹興九年

趙伯虎 紹興十六年

吳犯全衛名仁 紹興十二年

王 崧 紹興十五年

周 極 紹興十九年

張 昉 乾道元年

侍其銓 乾道二年

陳 岷 乾道八年

呂應問 紹興元年

詹堯可 紹興六年

楊壽亨 紹興十年

陳祖安 紹興九年

龔 相 紹興十三年

周允聞 紹興十六年

蔣思祖 紹興十二年

雷 粲 乾道元年

堵 觀 乾道五年

劉 俟 淳熙元年

趙汝諲 淳熙三年

楊樗年 淳熙九年

劉 璧 淳熙三年

楊 潛 紹熙元年

張 抃

樊 湛

趙汝章 嘉泰四年

汪立中 開禧二年四月到任十一月磨勘轉奉議郎

滕 珂 嘉定元年

樓 鏞 嘉定四年

徐安國 淳熙六年

葉仲英 淳熙二年

柳 楸 淳熙六年

張 穎

徐民瞻

錢 閻 嘉泰元年

湯 詵 開禧元年

徐晞稷 嘉定二年

陳 遇 嘉定五年

陸三省 嘉定六年

錢德謙 嘉定八年

張孝聞 嘉定三年

王 琮 嘉定七年

黃 崖 紹定元年

韓 曾 紹定六年

宋良才 嘉熙元年

蔡 朴 淳祐二年

鄭 南 淳祐七年

李百壽 嘉定七年

陳 鈞 嘉定一年

陳奇之 嘉定五年

詹 驕 寶慶三年

程 熹 紹定三年

楊 瑾 端平元年

韓 識 嘉熙四年

施退翁 淳祐四年

陳叔弼 淳祐八年

進士題名

唐博學宏辭科

陸贄 字敬輿西京試第六人

光啓二年

陸展 字祥文禮第一人

三禮科

顧謙

進士題名

華亭壯邑業儒者衆今訪之耆舊及考諸登科記自天禧三年迄於紹熙四年凡一百七十有七年登進士第者凡八十有八人其閒魁多士冠南宮入政府登從班者蓋不乏人亦云盛矣陳舜俞登慶歷六年第再中嘉祐四年材識兼茂明於體用科按國史舜俞湖州人知山陰縣時青苗法初行不奉令上疏自劾謫南康酒稅棄官而歸居秀之白牛村自號

白牛居士雖湖人不得不載也崇寧五年朱季資以內舍辟
離錄試於中書賜第紹興四年呂元亮以布衣被薦召對出
官皆非常科茲不載焉至若特恩則無題名可考姑摭耳目
之所見聞者附云

天禧二年王整榜

呂諤

天聖二年宋庠榜

呂詢

景祐元年張唐卿榜

呂評

慶歷六年賈黯榜

陳舜俞

字令舉嘉祐四年直
言極諫科第一人

嘉祐二年章衡榜

呂全

用開封貫

六年王俊民榜

朱伯虎

用開封貫
字才元第五甲第二人太子少師

八年許將榜

戴顯甫

一姓錢

朱鞏

用開封貫
字宏道伯虎從父

治平二年彭汝礪榜

朱伯熊

用開封貫伯虎之弟
字才翁宣奉大夫

熙寧三年葉祖洽榜

呂公美

用開封貫

六年余中榜

呂奎

用開封貫

元豐二年時彥榜

柳庭俊

工侍

章粹

用建寧貫

元祐三年李常寧榜

呂益柔

用開封貫甲科第
二人刑侍字文剛

張徽言

六年馬涓榜

朱紱

改名諤甲科第二
人右丞伯虎從子

富開

朱之純

用開

封貫

紹聖元年畢漸榜

柳庭傑 庭俊之弟

呂

犯欽宗御諱

四年何昌言榜

張天材 改名卿才

崇寧二年霍端友榜

朱紘 改名謙用開封貫紘之弟第三甲第一人

五年蔡疑榜

王箎

張甸

呂少蒙 用開封貫

大觀三年賈安宅榜

柳約 戶侍庭俊之弟

姚毅 改名焯

張昭

陳之元

衛上達 改名仲達禮書字達可

黃子服

政和五年何桌榜

衛開 八行宣教郎

黃鏗 鎮之弟

黃鎮

張康朝

八年嘉王榜

衛闡 字致虛涇之祖朝奉大夫贈太師魏國公

宣和元年貢士王俊乂榜

衛膚敏 甲科第三人禮侍闡從子字商彥

三年何渙榜

富說開之子

建炎二年李易榜

黃銓甲科

紹興二年張九成榜

孫朝彥用開封貫

五年汪應辰榜

任盡言用眉州貫甲科
質言弟字元受

朱冠卿

任質言用眉州貫

葛温卿用開封貫

八年黃公度榜

陳壽用泰州貫

董天民

十二年陳誠之榜

潘旦

十五年劉章榜

潘璋甲科改名
緯字仲寶

陳伯達

張圖南

十八年王佐榜

張偉字書言
鄉道成里人

林公望字叔山
崧宅里人

柳仲永字德脩
用鎮江貫

廿一年趙遠榜

張廷筠昭之子

鄭聞省元用開封
貫參知政事

廿四年張孝祥榜

衛稷仲達仲子處州教授

徐銳

廿七年王十朋榜

朱侑

三十年梁克家榜

許克昌用拱州貫字上達狀元

衛博字師文稷從弟樞密院編脩

張伯垓尚書

陳夢鵬用湖州貫

錢良臣參政字友魏

蓋經用開封貫字常父甲科戶侍

柳大雅用臨安貫

呂篆用平江貫

董天月

三十二年木待問榜

陳之方用建州貫

張子泳一姓朱又作隆興元年

乾道二年蕭國梁榜

朱繹之用湖州貫兵郎中甲科字貴言

趙善調玉牒

周益

五年鄭僑榜

王觀國用開封貫

葉昉

張序

趙善洙玉牒

吳伯凱用開封貫

徐玠用鎮江貫

柳梓

林廷瑞用平江貫

八年黃定榜

任巖叟 用通州貫

淳熙二年詹駉榜

衛藻 字德章仲達仲孫朝奉大夫

五年姚穎榜

趙師慄 玉牒

張之德

八年黃由榜

朱端常 用湖州貫繹之子尚書

柳說 用臨安貫

十一年衛涇 狀元閼之孫

十四年王容榜

胡林卿 用平江貫甲科

王正綱 用泰州貫

十六年上舍魁釋褐

林至 字德久官秘書省師朱晦庵

紹熙元年余復榜

趙汝澄 玉牒

慶元五年曾從龍榜

趙汝詒

嘉泰二年傅行簡榜

張淡

張渙臣

嘉定元年鄭自誠榜

衛价用鎮江貫仲達曾孫字藩叟

衛洽涇弟

四年趙建大榜

趙汝邨玉牒又作七年表甫榜

十三年劉渭榜

孫一飛
胡琚林卿之子

林革至之子

十六年蔣仲珍榜

張益臣

開慶元年周夢炎榜

葉汝舟

柳正孫

景定三年方山京榜

錢夢炎

咸淳元年阮登炳榜

曹應符字泰叔衢州司戶參軍

趙崇嘏

咸淳鄉貢進士陸霆龍字伯靈禮記郡魁

謝國光字觀夫

紹定二年黃朴榜

黃英發

五年徐元杰榜

杜從龍

嘉熙二年周坦榜

錢宜之

錢虞之

淳祐十年方逢辰榜

洪應辰

寶祐元年姚勉榜

錢拱之

布衣被召賜第

朱季賢 內舍 呂元亮

衛謙 字有山仲達六世孫宋末登第未詳何年

特奏名 附凡三十一人

章祝

詹奕

衛仲遠

衛稹

陳聖任

鄭澹 第二

吳正邦

陳世德

朱宗卿

葉簡

王鼎

姚端方

錢九韶

葉昂

朱振

張伯起

章移忠

鄭丙

林一飛

曹元鼎

柳榎

柳大韶

戚簡

黃裳

朱端復

朱伯龍

朱彥直

朱端禮

朱澥

朱聞

朱允

雲閒志卷中終



Table with 10 columns and 4 rows of text, including two red seals at the bottom.

朝聖王	朱宗樞	徐大猷	黃登忠	林維	朱宗樞	朱宗樞	朱宗樞	朱宗樞	朱宗樞
徐大猷	朱宗樞	徐大猷	徐大猷	徐大猷	朱宗樞	朱宗樞	朱宗樞	朱宗樞	朱宗樞
吳玉洪	王鼎	徐大猷	徐大猷	徐大猷	朱宗樞	朱宗樞	朱宗樞	朱宗樞	朱宗樞

Two red seals at the bottom of the table:

- Top seal: 中國社會科學院圖書館藏
- Bottom seal: 中國社會科學院圖書館藏

